

आकाशवाणी

खबरां

1. निर्वाचन आयोग मै अज्ज चार राज्यें ते इक केंद्र शासित प्रदेश आस्तै चुना कार्यक्रम दी घोषणा कीती।
2. सरकार नै पीएनजी ते एलपीजी दोनों कनेक्शन रखने आहले परोआरें गी फौरी अपना एलपीजी कनेक्शन सरेंडर करने दा निर्देश दिता।
3. नेपाल दे गोरखा जिले च बस हादसे च सत्त भारतीय तीर्थयात्रियों दी मौत।
4. सीबीएसई बोर्ड नै पश्चिम एशिया क्षेत्र च कल सोयां 10 अप्रैल तक होने आहले 12मी जमात द इमेताहन रद्द कीते।
5. ईरान नै संयुक्त अरब अमीरात पर खारग द्वीप पर हमलें आस्तै अपनी धरती दा इस्तेमाल करने दी इजाजत देने दा आरोप लाया, संयुक्त अरब अमीरात नै आरोपें गी खारिज कीता।
6. मौसम विभाग नै कल तक उत्तर भारत दे जमयादातर हिस्सें च गरज ते तूफान कन्ने ओले पोने दी चेतावनी जारी कीती।



Election Schedule

निर्वाचन आयोग नै अज्ज असम, केरल, पुदुचेरी ते तमिलनाडु च इक गैड च विधानसभा चुनाव करोआने दी घोषणा कीती, जिसलै कि पश्चिम बंगाल च दो गैड च चुनाव होंडन। चार राज्यें ते इक केंद्र शासित प्रदेश दे चुनाव कार्यक्रम दी घोषणा करदे होई अज्ज दिल्ली च मुख् निर्वाचन आयुक्त ज्ञानेश कुमार होरें दस्सेआ जे असम, केरल ते पुदुचेरी च मतदान 9 अप्रैल गी होग। तमिलनाडु च मतदान 23 अप्रैल गी होग। पश्चिम बंगाल च मतदान 23 अप्रैल ते 29 अप्रैल गी होग। पश्चिम बंगाल च पैहले गैड च 152 विधानसभा क्षेत्रें च मतदान होग, जिसलै कि दूए गैड च 142 विधानसभा क्षेत्रें च मतदान होग। सारे चार राज्यें ते इक केंद्र शासित प्रदेश च वोटें गी गिनतरी 4 मई गी होग। श्री कुमार होरें आक्खेआ जे चुनाव कार्यक्रम दी घोषणा दे कन्नै गै इने राज्यें ते केंद्र शासित प्रदेश च आचार संहिता फौरी प्रभाव कन्नै लागू होई गेई ऐ। श्री कुमार होरें दस्सेआ जे 5 विधानसभाएं दे 824 निर्वाचन क्षेत्रें दे चुनावें च लगभग 17 करोड़ 40 लाख मतदाता ना। इनदे च पश्चिम बंगाल दे लगभग 6 करोड़ 44 लाख, तमिलनाडु दे 5 करोड़ 67 लाख, केरल दे 2 करोड़ 70 लाख, असम दे ढाई करोड़ ते पुडुचेरी दे 9 लाख 44 हजार मतदाता शामिल ना। मुख् चुनाव आयुक्त होरें आक्खेआ जे चार राज्यें ते इक केंद्र शासित प्रदेश च कुल 2 लाख 19 हजार मतदान केंद्र होंडन। ते कुल 25 लाख चुनाव कर्मियों गी तैनात कीता जाग। मुख् निर्वाचन आयुक्त होरें आक्खेआ ऐ जे हर इक मतदान केंद्र पर पेयजल, शौचालय ते साइनबोर्ड जनेई घट्टोघट्ट सुविधा यकीनी करने दे निर्देश जारी कीते गए ना। उने आक्खेआ जे हाल च गै चुनाव गी मता पारदर्शी बनाने आस्तै चुनाव आयोग नै 30 नमी पैहले दी शुरुआत कीत ऐ। श्री कुमार होरें आक्खेआ जे हर इक मतदान केंद्र पर बद्दोबद्द 12 सौ मतदाता गै मतदान करी सकडन। सारे मतदान केंद्रें पर निगरानी आस्तै शत प्रतिशत वेबकास्टिंग होग। पश्चिम बंगाल दी 294 सदस्यीय विधानसभा दा कार्यकाल 7 मई गी समाप्त होआ र दा ऐ, असम दी 126 सदस्यीय विधानसभा दा कार्यकाल 20 मई गी खतम होआ र दा ऐ ते केरल दी 140 सदस्यीय विधानसभा दा कार्यकाल 23 मई गी खतम होआ र दा ऐ। तोआंई, तमिलनाडु दी 234 सदस्यीय विधानसभा दी कार्यकाल 10 मई गी ते पुदुचेरी दी 30 सदस्यीय विधानसभा दा कार्यकाल 15 जून गी मुक्का र दा ऐ।



PNG LPG

पेट्रोलियम ते कुदरती गैस मंत्रालय नै पाइप आहले कुदरती गैस- पीएनजी ते द्रवीकृत पेट्रोलियम गैस -एलपीजी दोनों दे कनेक्शन आहले परोआरें गी फौरी प्रभाव कन्नै अपना एलपीजी कनेक्शन सरेंडर करने दा निर्देश दिता ऐ। कल जारी इक अधिसूचना च मंत्रालय नै आक्खेआ ऐ जे पीएनजी कनेक्शन रखने आहले कुसै बी व्यक्ति गी घरेलू एलपीजी कनेक्शन रखने या सरकारी तेल कंपनियों या उनदे अधिकृत वितरकें सोयां एलपीजी सिलेंडर रिफिल लेने दी इजाजत नेई होग। ऐसे उपभोक्ताएं गी बी अपना एलपीजी कनेक्शन फौरी तौर पर सरेंडर करना होग। तेल विपणन कंपनियों गी बी निर्देश दिता गया ऐ जे ओहू उने उपभोक्ताएं गी नमे एलपीजी कनेक्शन जारी

नेई करै या रिफिल नेईदेंन जिनदे कश पैहले सोयां गै पाइप आहली प्राकृतिक गैस दी सुविधा ऐ। सरकार नै आक्खेआ ऐ जे एहू गै खाना पकाने दी गैस दी आपूर्ति च दोहराव गी रोकने ते यकीनी करने आस्तै पुट्टेआ गेआ ऐ। इस दौरान भारत दे राजनयिक प्रयासों दे मगरा, खाड़ी देशों सोयां एलपीजी लेईए जा र दे दो एलपीजी वाहक जहाज, शिवालिक ते नंदा देवी, कल सुरक्षित तौर पर होर्मुज जलडमरूमध्य गी पार करिए गए। जहाजरानी मंत्रालय दे विशेष सचिव राजेश कुमार सिन्हा होरें दस्सेआ ऐ जे एहू जहाज हुन गुजरात दे मुंद्रा ते कांडला बंदरगाहें आहली पेठा आवा'रदे ना। इनदे च करीब 92 हजार सात सौ मीट्रिक टन एलपीजी ऐ ते इन्दे औने दी तरीक मेद ऐ जे 16 मार्च ते 17 मार्च होगा।

<><><><><><>

US-Prez.

अमरीका दे राष्ट्रपति डॉनल्ड ट्रम्प होरें तेहरान आसेआ होर्मुज जल डमरू मध्य गी सुरक्षित रखने करी प्रभावित होए दे देशों गी अपने युद्धपोत भेजने दी गुजारश कीती ऐ। सोशल मीडिया दी इक पोस्ट च ट्रम्प होरें चीन, फ्रांस, जपान, दक्खन केरिया ते ब्रिटेन सने होरनें देशों गी अपील कीती ऐ जे ओहू होर्मुज च अपने युद्धपोत भेजना। उनें आखेआ ऐ जे अमरीका, समुंद्री कंडे आले इलाकें च बम्बारी जारी रक्खग ते ईरानी जहाजें ते किश्तिएं गी निशाना बनांदा रौहगा। ध्यानजोग ऐ जे जंदी 28 फरवरी गी अमरीका ते इजराइल नै सांझे तौरा पर ईरान पर इक बड्डा हमला शुरू कीता हा ते ईरान दी जवाबी कार्रवाई दे कन्नै हुन एहू जंग पूरे खाड़ी इलाके च फैली गेदा ऐ।

<><><><><><>

HM

गृह मंत्री अमित शाह होरें आक्खा जे भाजपा दे नेतृत्व आहली सरकार नै पिच्छले 10 बरें च असम गी पूर्वोत्तर क्षेत्र आस्तै इक प्रमुख सेहत सेवा केंद्र दे तौर पर विकसित कीता ऐ। इसदे कन्नै लोकें गी इलाज आस्तै क्षेत्र सोयां बाहर यात्रा करने दी जरूरत घट्ट होई गई ऐ। श्री शाह होरें गुवाहाटी च सेहत क्षेत्र कन्नै सरबंधित बक्ख बक्ख विकास परियोजनाएं दा नीहू पत्थर रक्खेआ ते केईए दा उद्घाटन करने दे मौके पर एहू गल्ल आक्खी।

<><><><><><>

Gold

राजस्व खुफिया निदेशालय -डीआरआई नै दिल्ली ते कोलकाता च चला'रदे सुन्ने दी तस्करी ते गैर कनूनी तौर पर सोना पिघलाने आहले संगठित गिरोह दा पर्दाफाश कीता ऐ। खजाना मंत्रालय नै दस्सेआ ऐ जे इस अभियान दे तैहत 14 करोड़ रुपे सोयां मते दे मूल्य दा सुन्ना, चांदी ते भारती मुद्रा जब्त कीती गई ऐ।

<><><><><><>

Nepal Accident

नेपाल दे गोरखा जिले च कल सजा इक बस हादसे च 7 भारतीय तीर्थयात्रियों दी मौत होई गई ते केई होर घायल होई गए। पुलिस मूजब बस च 16 लोग सवार हे जिनदे च 14 भारतीय तीर्थयात्री शामिल हे। एहू सारे मनकामना मंदिर सोयां परतोआ'रदे हे। घायलें दा इलाज कीता जा'रदा ऐ।

<><><><><><>

EAM-Brussels Visit

विदेश मंत्री डॉ. एस. जयशंकर होरें अज्जै थमां द'ऊं दिनें दे ब्रसेल्स दौरे पर जा करदे ना। उंदा एहू दौरायूरोपी संघ दे उच्च प्रतिनिधि ते उपराष्ट्रपति काजा कल्लास हुंदे साद्दे पर लगा'रदा ऐ। दौरे दरान डॉ. जयशंकर होर विदेशी मामले सरबंधी परिषद दी बैठका च यूरोपीय संघ दे 27 मिम्बर मुल्लें दे विदेश मंत्रिएं कन्नै गल्लबात करडन। एहूदे इलावा उंदा बैल्जियम ते होरनें मिम्बर मुल्लें दे विदेश मंत्रिएं कन्नै बक्खरे-बक्खरे बी बैठक करडन। विदेश मंत्रालय नै जानकारी दिती ऐ जे इस दौरे कन्नै भारत दी यूरोपी संघ कन्नै सामरिक सरबंधें दे होर गैहरे होने दी मेद ऐ।

<><><><><><>

Air India Flight Cancelled

पच्छिम एशिया च बने दे हालात बश्कार एयर इंडिया ते एयर इंडिया एक्सप्रेस नै अज्ज 14 डोआरियां रद्द करने दी घोशणा कीती ऐ। उआं शारजाह थमां दिल्ली, कन्नूर, कोच्चि, कोझिकोड, मुम्बई ते तिरवंतपुरम ताई डोआरियां चलाने दी योजना बनाई ऐ। एयर इंडिया नै इक बयानै च आखेआ जे 2 डोआरियां रस अल खैमाह थमां कोझिकोड ते कोच्चि बश्कार संचालित होइन्। एयरलाइन नै दस्सेआ जे डोआरियां स्लाट दी उपलब्धता ते संचालन दे समें दे मौजूदा हालात पर चलाइयां जाइन्।

<><><><><><>

CBSE-Exam Cancel

केंद्री माध्यमिक शिक्षा बोर्ड-सी.बी.एस.ई नै पच्छिम एशियाई क्षेत्र च कल्लै थमां अगले म्हीने दी 10 तरीक तगर होने आहले म्तेयान रद्द करी दित्ते न। बोर्ड नै दस्सेआ जे पैहले मुलतवी कीते गेदे म्तेयान बी रद्द रौहइन्। बोर्ड नै दस्सेआ जे पच्छिम एशियाई क्षेत्र च 12मीं जमात दे विद्यार्थियें ताई नतीजे घोशित करने दा तरीका बाद च दस्सेआ जाह्ग।

<><><><><><>

JK-SIT

जम्मू-कश्मीर पुलस नै साबका मुखमंत्री ते जम्मू-कश्मीर नेशनल कांफ्रेंस दे अध्यक्ष डॉ. फारूक अब्दुल्ला हुंदे पर होए दे हमले ते हत्या दी कोशश दी जांच आस्तै 7 सदस्यें दी बशेष जांच टीम सिट दा गठन कीता ऐ। एहू टीम जम्मू-साम्बा-कठुआ रेंज दे पुलस उप महानिदेशक हुंदी निगरानी च कम्म करोग। टीम गी मामले दी व्यापक जांच करने ते इसी तय समें च पूरा करने दे निर्देश दित्ते गए न। एहू घटना 11 मार्च गी पेश आई ही, उसलै फारूक अब्दुल्ला होर जम्मू च इक ब्याह समारोह च शामिल होने लेई गेदे हे। आई.जी.पी जम्मू जोन भीम सिंह टूटी हुंदे निर्देश पर इस टीम दा गठन कीता गेआ ऐ।

<><><><><><>

Athawale JK Devp.

केंद्री सामाजिक न्याय ते अधिकारिता राज्यमंत्री रामदास अठावले होरें साबका मुखमंत्री डॉ. फारूक अब्दुल्ला हुंदे पर हाल च गै होए दे हमले दी सख्त निंदा कीती ऐ। जम्मू च इक प्रेस कांफ्रेंस गी संबोधित करदे होई अठावले होरें आखेआ जे इस चाल्ली दियां घटनां मेदे भागें आहिलियां न ते लोकतांत्रिक समाज च ऐसी घटना नेई होना लोइचदियां। अठावले होरें इस गल्ला पर जोर पाया जे जम्मू-कश्मीर च अमन-रमानदारी ते आपसी भाईचारा बनाए रखे जाना लोइचदा ऐ ते हमले लेई जिम्मेदार लोकें खलाफ सख्त कार्रवाई दी मंग कीती। केंद्री मंत्री होरें प्रधानमंत्री नरेंद्र मोदी हुंदी नुमायंदगी च केंद्र सरकार आसेआ जम्मू-कश्मीर च रम्भ कीती गेदियें नेकें विकास पहलें पर बी लौऽ पाई।

<><><><><><>

Ladakh-Road Open

लद्दाख च बड़ी मती बर्फबारी करिपिछले 6 दिनें थमां बंद राश्ट्री जरनैली शिडक 1 पर स्थित जोजीला दरें पर गड्डियें दी आओजाई परतियै रम्भ होई गेई। शडक दी मरम्मत मगरा अधिकारियें सोनमर्ग थमां लद्दाख बक्खी जाने आहिलियें गड्डियें दी आओजाई गी खुल्ल देई दित्ती ऐ। आकाशवाणी संवाददाता नै दस्सेआ जे बर्फ साफ करने आहिलियें टीमें सडक दी मरम्मत ते गड्डियें दी सुरक्षित आओजाई गी यकीनी बनाने ताई लगातार कम्म कीता। उआं अधिकारियें सफर रम्भ करने शा पैहले मौसम ते सडक दी हालात बारै जांच करने दी सलाह दित्ती ऐ।

<><><><><><>

Infiltration-Foiled

भारती सेना नै उड़ी सैक्टर च इक पाकिस्तानी आतंकवादी गी मारी मकांदे होई घुसपैठ दी इक कोशश गी नाकाम बनाई दित्ता ऐ। फौज दी चिनार कोर नै सोशल मीडिया मंच-एक्स पर दित्ती गेदी जानकारी च दस्सेआ ऐ जे 14 ते 15 मार्च दी दरम्यानी रातीं चलाए गेदे इक सांझे अभियान दरान सुरक्षाबलें बन्ने पर किश नक्लो-करत दिक्खी। मगरा ललकारे जाने पर आतंकवादी नै अन्नेबाहू गोलीबारी शुरू करी दित्ती। सुरक्षाबलें दी कार्रवाई च इक पाकिस्तानी आतंकवादी मारेआ गेआ। टाक्करे आली थाहै थमां असलाह-बरूद बरामद कीता गेआ ऐ। तोआई, फौज

दी उत्तरी कमान दे कमांडर लेफ्टिनेंट जनरल प्रतीक शर्मा होरें इक पाकिस्तानी आतंकवादी गी मारी मकाने ते घुसपैठ दी भैड़ी कोशश गी नाकाम बनाने लेई सौह्गे बलें दी सराहना कीती ऐ।

<><><><><><>

India-Condemn Pak.

भारत नै अफगानिस्तान दे क्षेत्र च पाकिस्तान दे ब्हाई हमले दी निंदा कीती ऐ। इनें हमलें च केई नागरिकें दी मौत होई गेई ते केई सारे ढांचे गी नुकसान पुज्जा ऐ। सोशल मीडिया दी इक पोस्ट च मंत्रालय दे प्रवक्ता रणधीर जायसवाल होरें आखेआ ऐ जे एहू पाकिस्तानी बवस्था आसेआ कीता गेदा इक होर हमला ऐ। एहू अफगानिस्तान दी विचारधारा दे प्रति शत्रुतापूर्ण हमला ऐ। जायसवाल होरें आखेआ जे भारत अफगानिस्तान दी सम्प्रभुता ते क्षेत्रीय अखंडता गी पूरी चाल्ली सम्मान दित्ते जाने आहली गल्ल गी दोहरांदा ऐ।

<><><><><><>

JK-PMAY-G

अधिकारियें अज्ज जानकारी दिंदे होई दस्सेआ जे जम्मू-कश्मीर नै प्रधानमंत्री ग्रामीण आवास योजना ग्रामीण तैहत 3 लक्ख शा बद्द घरें दा निर्माण पूरा करी लैता ऐ जेदे कन्नै 97 प्रतिशत लक्ष्य हासल होई गेआ ऐ। ग्रामीण विकास ते पंचैती राज मैहकमे दे सैक्रेटरी मोहम्मद एजाज असद होरें इस योजना तैहत बाकी बचे दे 11,340 घरें दे निर्माण कम्में च तेजी आहनने दे निर्देश जारी कीते। प्रदेश च PMAY-G दी समीक्षा ताई सद्दी गेदी इक बैठक दरान असद होरें आखेआ जे इस स्कीमै दा मजूदा गेड़ पूरा होने आहला ऐ ते मौजूदा गेड़ तैहत मंजूरशुदा सब्बै कम्म नमां गेड़ रम्भ होने शा पैहले बिजन कुसै चिर दे पूरा कीते जाने लोडचदे। बैठक च दस्सेआ गेआ जे कुल 3 लक्ख 23 ज्हार 299 घरें दा निर्माण पूरा होई चुके दा ऐ।

<><><><><><>

Tehran UAE

ईरान नै संयुक्त अरब अमीरात – यू.ए.ई पर दोष लाया ऐ जे औने अपने क्षेत्र दा इस्तेमाल ईरानी ठिकानें पर मिसाइल हमलें आस्तै होन दिता। ईरान दे इस आरोप मगरा खाड़ी क्षेत्र च तनाव होर बदी गेआ ऐ। ईरान दे विदेश मंत्री सैयद अब्बास अराघची होरें दोष लाया जे दो ईरानी ठिकाने खारग द्वीप ते अबू मूसा पर रात भर होए दे हमले रास अल खैमाह ते दुबई कश तैनात हिमर्स रॉकेट प्रणालियें राए कीते गए न। ईरान दे खतम अल-अनबिया केंद्रीय मुख्यालय नै यू.ए.ई दे निवासियें गी जेबेल अली, खलीफा बंदरगाह ते फुजैरा बंदरगाह सने प्रमुख बंदरगाहें कश दे क्षेत्रें गी खाली करने दी चेतावनी दिती ऐ। तोआंई, यू.ए.ई सरकार नै इने आरोपें गी पूरी चालली खारिज करी दिता ऐ। राष्ट्रपति हुन्दे सलाहकार अनवर गर्गश होरें दस्सेआ जे देशै नै अपने क्षेत्र सोयां हमलें दी इजाजत नेई दिती। संयुक्त अरब अमीरात दे फुजैरा च आपातकालीन टीमें इक तेल सुविधा केंद्र पर अगग सहालने दा कम्म कीता। एहू अगग उसलै लगगी जिसलै इक ड्रोन गी बीच च मारी मकया गेआ। अधिकारियें दस्सेआ जे इस घटना च जॉर्डन दे इक नागरिक गी चोट आई ऐ, पर इस करी व्याडपाक परिचालन च कोई बाधा नेई आई ऐ। इस दौरान, यू.ए.ई नै अज्ज बडलै इक नमे मिसाइल हमले दी सूचना दिती ऐ। तोआंई, अमरीका दे राष्ट्रपति डॉनल्ड ट्रम्प होरें आखेआ जे उनें गी मेद ऐ जे सहयोगी देश होर्मुज जलडमरूमध्य दी सुरक्षा आस्तै युद्धपोत भेजडन।

<><><><><><>

Iran FM-

ईरान दे विदेश मंत्री अब्बास अराघची होरें आखेआ ऐ जे रणनीतिक तौर पर महत्वपूर्ण होर्मुज जल डमरू मध्य अंतरराष्ट्री शिपिंग आस्तै चालू ऐ पर अमरीका ते इजराइल कन्नै जुडे दे ज्हाजें गी इस रस्ते राएं लंगघने दी इजाजत नेई ऐ। उंदी एहू टिप्पणी हालिया फौजी घटनाएं दे बाद क्षेत्र च बधी दी तनोतनी दे चलदे आई ऐ। इक अमरीकी केबल न्यूजी चैनल गी दित्ते गेदे इंटरव्यू च अराघची होरें आखेआ जे एहू समुंद्री रस्ता पूरी चाल्ली बंद नेई कीता गेआ ऐ। ईरान दे मंत्री हुंदा एहू दावा ऐसे समें पर आया ऐ जिसले केई भारती जहाज बी उत्थे फंसे दे न।

<><><><><><>

CM-Online Garden Ticketing

मुख्यमंत्री उमर अब्दुल्ला होरें जम्मू-कश्मीर दे सारे बगीचें च प्रवेश आस्तै ऑनलाइन टिकट बुकिंग प्रणाली दी शुरूआत कीती। एहू गैंड डिजिटलीकरण गी बढ़ावा देने ते सैलानिएं लेई सहूलत बदाने दी दिशा च इक महत्वपूर्ण गैंड मन्नी जा'रदी ऐ। बगीचे च प्रवेश टिकट खरीदने दी प्रक्रिया गी सैलानिएं आस्तै सौखा, पारदर्शी ते असान

बनाने दे मकसद कन्नै बगीचे ते फुल्लें दी काश्त सरबंधी मैहकमा ते जम्मू-कश्मीर बैंक दी सांझी पैहल पर डिजिटल मंच विकसित कीता गेआ ऐ। लोक सरबंधत विभाग दे पार्टल राएं आनलाइन टिकट बुक करी सकदे न

<><><><><><>

Tulip-Garden Reopen

एशिया दा सबनें शा बड्डा इंदिरा गांधी मैमोरियल ट्यूलिप गार्डन कल्लै थमां लोकें लेई खुल्ले आस्तै पूरी चाल्ली तैयार ऐ। मुखमंत्री उमर अब्दुल्ला होर औपचारिक तौरा पर सैलानियें लेई इस बाग गी खोलडन। ट्यूलिप गार्डन दे परतिय खुल्लने पर अपनी खुशी प्रगट करदे होई उमर होरें अपने निजी एक्स अकाउंट पर आखेआ जे अज्ज उनेंगी श्रीनगर च ट्यूलिप गार्डन दी झलक दिक्खने दा मौका लब्बा। उनें आखेआ जे बाग बड्डा गै शानदार लगगा करदा ऐ। मुखमंत्री होरें आखेआ जे बागवानें दी टीम नै मैहकमे दे अफसरें दी दिक्ख-रिक्ख च बेहतरीन कम्म कीता ऐ ते कन्नै गै आखेआ मौसम इकदम सेई ते रंग बडे गै खूबसूरत न।

<><><><><><>

Mughal-Road closed

ट्रैफिक पुलिस दे अफसरें अज्ज दपैहरी दस्सेआ जे पीर गी गली च होई दी ताजा बर्फबारी ते बरखा परैंत ऐतिहासिक मुगल रोड गी हर चाल्ली दी गड्डियें लेई बंद करी दिता गेआ ऐ। एसएसपी ट्रैफिक रूरल जम्मू फारूक कैसर होरें आखेआ जे शिडकै गी खराब मोसम करियै एहतियाती गैंड दे तौरा पर बंद कीता गेआ ऐ। उनें आखेआ जे अगली सूचना तगर मुसाफिरें गी मुगल रोड पर सफर नेई करने दी सलाह दिती गई ऐ। उनें आखेआ जे शिडकै दे ताजा हालात दी जानकारी उसलै दिती जाह्ग जिसलै इसी सुरक्षित घोशित करियै गड्डियें दी आओजाई लेई खोली दिता जाह्ग।

<><><><><><>

Weather

मौसम विभाग ने दिल्ली, चंडीगढ़, हरियाणा, पंजाब, उत्तर प्रदेश, उत्तराखंड ते जम्मू-कश्मीर च कल तक ओले पौने ते गरज-चमक कन्नै तूफान दा अर्रिंज अलर्ट जारी कीता ऐ। अरुणाचल प्रदेश, असम ते मेघालय च बी कल तक किश थाहरें पर तेज बरखा दी संभावना जाहिर कीती ऐ। तोआंई, जम्मू-कश्मीर, लद्दाख, हिमाचल प्रदेश ते उत्तराखंड च बीरवार तगर बिजली कड़कने, तेज हवा चलने ते गरज-चमक कन्नै तूफान दी शेंका जाहिर कीती ऐ।

<><><><><><>